

# Banjir 2 negeri makin buruk

» Jumlah mangsa di Kelantan, Terengganu 8,167 orang

Oleh Nur Farhanin Abdullah, Jauhariatul Akmal Johar dan Faizul Azlan Razak  
bhnews@bharian.com.my

■ Kota Bharu

**B**anjir di Kelantan dan Terengganu bertambah buruk sehingga memaksa 8,167 mangsa di kedua-dua negeri dipindahkan semalam.

Setakat jam 6 petang, 5,501 orang dari 1,670 keluarga termasuk 1,698 wanita dan 2,556 kanak-kanak dari tujuh jajahan iaitu Kota Bharu, Kuala Krai, Machang, Pasir Mas, Pasir Puteh, Tanah Merah dan Tumpat dipindahkan ke 38 pusat pemindahan.

## Setiu catat mangsa tertinggi

Bencana turut menyebabkan laluan di Kilometer 3 Jalan Pohon Tanjung-Pasir Pekan di Kampung Pasir Pekan Hilir, Tumpat, ditutup untuk semua kenderaan. Paras air Sungai Golok di Rantau Panjang berada pada 10.39 meter, melepasi paras bahaya 9 meter, ma-



Anggota Jabatan Bomba dan Penyelamat Malaysia Kelantan **membantu memindahkan mangsa banjir** di Kampung Sebidang, Tumpat, semalam. [FOTO BERNAMA]

nakala Sungai Kelantan di Jambatan Guillemard mencecah paras bahaya 16 meter.

Sementara itu, Pengarah Bomba dan Penyelamat Kelantan, Azmi Osman menasihatkan orang ramai supaya meletak kenderaan di tempat bersesuaian, bukan secara sesuka hati di kiri dan kanan jalan bagi mengelakkan kesesakan yang menyukarkan petugas menjalankan operasi membantu mangsa dan mengagihkan bekalan barangan.

Di **Terengganu**, daerah Setiu mencatatkan jumlah mangsa banjir tertinggi apabila 2,666 penduduk dari 603

keluarga dipindahkan ke 30 pusat pemindahan setakat 3.45 petang semalam.

## 16 pusat pemindahan

Jurucakap Bilik Gerakan Banjir negeri berkata, sejak banjir melanda, seramai 10,487 mangsa dari 2,596 keluarga sudah dipindahkan ke 131 pusat pemindahan di seluruh negeri termasuk 2,272 dari 613 keluarga di 23 pusat pemindahan di Kemaman dan 1,983 dari 498 keluarga ke 29 pusat pemindahan di Dungun.

Di **Besut**, 16 pusat pemindahan dibuka bagi menempatkan 1,088 mangsa dari 243 keluarga dan di Hulu Tereng-

ganu, 1,390 mangsa dari 358 keluarga berada di 16 pusat pemindahan selain 807 mangsa dari 211 keluarga yang dipindahkan ke lapan pusat pemindahan di Kuala Terengganu serta 281 mangsa dari 70 keluarga di Marang ke sembilan pusat pemindahan.

Antara laluan yang ditenggelami banjir adalah Jalan Kuala Berang-Sungai Tong di Hulu Terengganu, Jalan Bukit Diman-Felda Tersat dan Jalan Utama Mengkawang-Tersat di Kuala Terengganu, selain Jalan Seberang Jerteh-Kuala Besut di Besut serta Jalan Felda Neram dan Jalan Chukai/Air Putih di Kemaman.